

唐詩所前集


二十四

十六

七言古詩

漢書門			
三	八	四	一
二	〇	三	一
冊	架	函	號

內閣文庫			
三	一		漢
九	八		書
函	〇		
二	三	四	
六	二	三	
架	冊	號	類



內閣文庫	
番號	漢 11843
冊數	32 (16)
函號	319 124



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



唐詩所第二十四卷

古詩

淺前集

七言

景隆四年正月五日移仗蓬萊宮御大明殿會吐蕃騎馬之戲因重為栢梁體聯句

大明御寓臨萬方

中宗

顧慙內政翊陶唐

皇后

鸞鳴鳳

舞向平陽

長寧公主

秦樓魯館沐恩光

安樂公主

無心為子輒求

郎

太平公主

雄才七步謝陳王

溫王重茂

當熊讓輦愧前芳

上官昭容

再司銓筮思可忘

吏部侍郎崔湜

文江學海思濟航

著作郎鄭愔

萬

邦考績臣所詳

老功員外郎武平一

著作不休出中腸

著作郎閻朝隱

權

豪屏跡肅嚴霜

御史大夫竇從一

鑄鼎開嶽造明堂

將作大匠宗晉卿

匠

唐詩七言

卷第二十四

二

玉醴由來獻壽觴

吐蕃舍人明悉獵

十月誕辰內殿宴羣臣效栢梁體聯句

潤色鴻業寄賢才

中宗

叨居右弼愧鹽梅

李嶠

運籌帷

幄荷時來

宗楚客

職掌圖籍濫蓬萊

劉憲

兩司謬忝謝鍾

裴

崔湜

禮樂銓管効涓埃

鄭愔

陳師振旅清九垓

趙彥昭

欣承顧問侍天杯

李適

銜恩獻壽栢梁臺

蘇頲

黃縑青

簡奉康哉

盧藏用

鰕生侍從忝王枚

李义

右掖司言實不

才

馬懷素

宗伯秩禮一作天地開

薛稷

帝歌難續仰昭回

宋之問

微臣捧日變寒灰遠慙班左愧遊陪

上官婕妤

大言聯句

高歌閬風步瀛洲

書

燁鵬燐鯤餐未休

顏真卿

四方上下

無外頭

粵

一啜頓涸滄溟流

薦

小言聯句

長路遥遥吞吐絲

真卿

蟪蛄蚊睫察難知

書

樂語聯句

苦河既濟真僧喜

粵

新知滿座笑相視

真卿

戍客歸來

見妻子

書

學生放假偷向市

薦

饒語聯句

拈飽舐指不知休

粵

欲炙侍立涎交流

真卿

過屠大嚼

肯知羞

書

食店門外強淹留

薦

滑語聯句

雨裏下山踏榆皮真卿 莓苔石橋步難移晝 蕪蕪醬醋
喫煮葵全白 縫靴蠟線油塗錐粵 急逢龍背須且騎李益

醉語聯句

逢糟遇麴便酩酊全白 覆車墜馬皆不醒真卿 倒着接
離髮垂領晝 狂心亂語無人並羽

長安古意

盧照隣

長安大道連狹斜青牛白馬七香車玉輦縱橫過主第
金鞭一作鞍 絡繹向侯家龍銜寶蓋承朝日鳳吐流蘇帶
晚霞百丈遊絲爭繞樹一羣嬌鳥共啼花啼花戲蝶干

門側碧樹銀臺萬種色複道交牕作合歡雙闕連薨垂
鳳翼梁家畫閣天中起漢帝金莖雲外直樓前相望不
相知陌上相逢詎相識借問吹簫向紫煙曾經學舞度
芳年得成比目何辭死願作鴛鴦不羨仙比目鴛鴦真
可羨雙去雙來君不見生憎帳額繡孤鸞好取門簾帖
雙燕雙燕雙飛繞畫梁羅幃翠被鬱金香片片行雲着
蟬鬢纖纖初月上鴉黃鴉黃粉白車中出含嬌含態情
非一妖童寶馬鐵連錢娼婦盤龍金屈膝御史府中烏
夜啼廷尉門前雀欲棲隱隱朱城臨御道遥遥翠幃沒
金隄挾彈飛鷹杜陵北探丸借客渭橋西俱邀俠客笑

蓉劍共宿娼家
李蹊娼家日暮紫羅裙清歌一轉口
氛氲北堂夜夜人如月南陌朝朝騎似雲南陌北堂連
北里五劇三條控三市弱柳青槐拂地垂佳氣紅塵暗
天起漢代金吾千騎來翡翠屠蘇鸚鵡杯羅襦寶帶爲
君解燕歌趙舞爲君開別有豪華稱將相轉日回天不
相讓意氣由來排灌夫專權判不容蕭相專權意氣本
英雄青虬紫燕坐春一作生風自言歌舞長千載自謂驕
奢凌五公節物風光不相待桑田碧海須臾改昔時金
階白玉堂卽今惟見青松在寂寂寥寥楊子居年年歲
歲一牀書獨有南山桂花發飛來飛去襲人裾

古意

和李侍郎嶠

喬知之

妾家巫山隔漢川君度南庭向胡苑一作宛高樓迢遞想
金天河漢昭回更愴然夜如何其夜未央閒花照月愁
洞房自矜夫壻勝王昌三十曾作侍中郎一從流落成
漁陽懷哉萬恨結中腸南山羃羃兔絲花北陵青青女
蘿樹由來花葉同一根今日枝條分兩處三星差池光
照灼北斗西指秋雲薄莖枯花謝枝憔悴香銷色盡花
零落美人長嘆艷容萎含情收取摧折枝調絲獨彈聲
未移感君行坐星歲遲閨中宛轉今若斯誰能爲報征
人知

古意

常建

井底玉冰洞地明琥珀
轆轤青絲索仙人騎鳳披彩霞
挽上銀瓶照天閣黃金作身
雙飛龍口銜明月噴芙蓉
一時渡海望不見曉上青樓十二重

古意

畢耀

璇閨繡戶斜光入千金女兒倚門立
橫波美目雖後來羅被遙遙不相及
聞道今年初避人珊珊挂鏡長隨身
願得侍兒爲道意後堂羅帳一相親

古興

常建

轆轤井上雙梧桐飛鳥銜花日將沒
深閨女兒莫愁年

玉指泠泠怨金碧石榴裙裾蛺蝶飛
見人不語顰蛾眉青絲素絲紅綠絲
織成一作女綿衾當爲誰

感遇

岑參

五花驄馬七香車云是平陽帝子家
鳳皇城頭日欲斜門前高樹鳴春鴉
漢家魯元君不聞今作城西一古墳
昔來唯有秦王女獨自吹簫乘白雲

雜感

鮑防

漢家海內承平久萬國戎王皆稽首
天馬嘗銜苜蓿花胡人歲獻蒲萄酒
五月荔枝初破顏朝辭象郡夕函關
鴈飛不度桂陽嶺馬走先過林邑山
甘泉御果垂僊閣

日暮無風香自落遠物皆重近皆輕雞雖有德不如鶴

送崔五太守

王維

長安廐吏來到門朱文露網動行軒黃花縣西九折坂
玉樹宮南五丈原褒斜谷中不容幘唯有白雲當露冕
子午山裏杜鵑啼嘉陵水頭行客飯劍門忽斷蜀川開
萬井雙流滿眼來霧中遠樹刀州出天際澄江巴字迴
使君年幾一作紀三十餘少年白晢專城居欲持畫省郎
官筆迴與臨邛父老書

送劉四赴夏縣

李頎

九霄獨立紅鸞姿萬仞孤生玉樹枝劉侯致身能若此

天骨自然多嘆美聲名播揚二十年足下長途幾千里
舉世皆親丞相閣我心獨愛伊川水脫略勢利猶埃塵
嘯傲時人而已矣新詩數歲卽文雄上書昔召蓬萊宮
明主拜官麒麟閣光車駿馬看玉童高人居止廬山遠
隱士往來張長公扶南甘蔗甜如蜜雜以荔枝龍州橘
赤縣繁詞滿劇曹白雲孤峯暉永日朝持手板望飛鳥
暮誦楞伽對空室一朝出宰汾河間明府下車人吏閒
端坐訟庭更無事開門咫尺巫咸山男耕女織蒙惠化
麥熟雉鳴長秋稼明年九府議功時五辟三徵當在茲
聞道桐鄉有遺老邑中還欲置生祠

送渾將軍出塞

高適

將軍族貴兵且強漢家已是渾邪王子孫相承在朝野
至今部曲燕支下控弦盡用陰山兒登一作臨陣長騎大
宛馬銀鞍玉勒繡螭弧每逐嫖姚破骨都李廣從來先
將士衛青未肯學孫吳傳有沙場千萬騎昨日邊庭羽
書至城頭畫角三四聲匣裏寶刀晝夜鳴意氣能甘萬
里去辛勤動一作判作一年行黃雲白草無前後朝建旌
旄夕刁斗塞下應多俠少年關西不見春楊柳從軍借
問所從誰擊劍酣歌當此時遠別無輕繞朝策平戎早
寄一作獻仲宣詩

送羽林陶將軍

李白

將軍出使擁樓船江上旌旗拂紫煙萬里橫戈探虎穴
三盃拔劍舞龍泉莫道詞人無膽氣臨行將贈繞朝鞭
送李副使赴磧西官軍
岑參

火山六月應更熱赤亭道口行人絕知君慣度祈連城
豈能愁見輪臺月脫鞍一作衣暫入酒家壚送君萬里西
擊胡功名祇向馬上取真是英雄一丈夫

送程劉二侍御兼獨孤判官赴西安幕府

李白

安西幕府多材雄喧喧唯道三數公繡衣貂裘明積雪

飛書走檄如飄風朝辭明主出紫宮銀鞍送別金城空
天外飛霜下葱海火旗雲馬生光彩胡塞塵清計日歸
漢家草綠遙相待

送韓巽入都覲省便赴舉

岑參

槐葉蒼蒼柳葉黃秋高八月天欲霜青門白壺送韓侯
白雲千里連嵩丘北堂倚門望君憶東歸扇枕後秋色
洛陽才子能幾人明年桂枝是君得

與諸公送陳郎將歸衡陽

序曰仲尼旅人文王明夷苟非其時聖賢低眉

况僕之不肖者而遷逐枯槁固非其宜朝心不朝暮鬢盡白而登高送遠使人增悲陳郎將義風凜然英思逸發來下曹城之榻去邀才子之詩動清興於中流泛素波而徑去諸公仰望不

及連章祖之序慚起予輒冠名賢之首作者唯我乃為撫掌之資乎李白

衡山蒼蒼入紫冥下看南極老人星迴飈吹散五峯雪
往往飛花落洞庭氣清目一作嶽秀有如此郎將一家拖

金紫門前食客亂浮雲世人皆比孟嘗君江上送行無
白壁臨岐惆悵若為分

送費子歸武昌

岑參

漢陽歸客悲秋草旅舍葉飛愁不掃秋來倍憶武昌魚
夢着只在巴陵道曾隨上將過祈連離家十年恒在邊
劔鋒可惜虛用盡馬蹄無事今已穿知君開館常愛客
樗蒲百金每一擲平生有錢將與人江上故園空四壁

吾觀費子毛骨竒廣眉大口仍赤髭看君失路尚如此
人生貴賤那得知高秋八月歸南楚東門一壺聊出祖
路指鳳凰山北雲衣沾鸚鵡洲邊雨勿歎蹉跎白髮新
應須守道勿羞貧男兒何必戀妻子莫向江村老却人

送楊山人歸嵩陽

高適

不到嵩陽動十年舊時心事已徒然一二故人不復見
三十六峯猶眼前夷門二月柳條色流鶯數聲淚沾臆
鑿井耕田不我招知君以此忘帝力山人好去嵩陽路
惟余眷眷長相憶

同王昌齡送族弟襄歸桂陽

李白

爾家何在瀟湘川青莎白石長江邊昨夢江花照江月
一作幾枝正發東牕前覺來欲往心悠然竟隨越鳥飛
一作南天秦雲連山海相接桂水橫煙不可涉送君此去令
人愁風帆茫茫隔河洲春潭瓊草綠可折西寄長安明
月樓

送族弟綰從軍安西

漢家兵馬乘北風鼓行而一作西破犬戎爾隨漢將出
門去剪虜若草收竒功君王按劍望邊色一作旄頭已
落胡天空匈奴繫頸數應盡明年應一作驅入蒲萄宮

送陳章甫

李頎

古詩 卷二十四 九
四月南風大麥黃棗花未落桐陰長青山朝別暮還見
嘶馬出門思舊鄉陳侯立身何坦蕩虬鬚虎眉仍大顙
腹中貯書一萬卷不肯低頭在草莽東門酤酒飲我曹
心輕萬事如一作皆鴻毛醉臥不知白日暮有時空望孤
雲高長河浪頭連天黑津吏停舟渡不得鄭國遊人未
及家洛陽行子空歎息聞道故林相識多罷官昨日今
如何

送劉十

三十不官亦不娶時人焉識道高下房中唯有老氏經
櫪上空餘少游馬往來嵩華與函秦放歌一曲前山春
西林獨鶴引閒步南澗飛泉清角巾前年上書不得意
歸卧東牕兀然醉諸兄相繼掌青史第五之名齊驃騎
烹葵摘果告我行落日夏雲縱復橫聞道謝安掩口笑
知君不免爲蒼生

送蔡山人

高適

東山布衣明古今自言獨未逢知音識者閱見一生事
到處豁然千里心看書學劍長辛苦近日方思謁明主
斗酒相留醉復醒悲歌數年淚如雨丈夫遭遇不可知
買臣主父皆如斯我今蹭蹬無所似看爾崩騰何若爲
送孔巢父謝病歸遊江東兼呈李白

杜甫

巢父掉頭不肯住東將入海隨烟霧詩卷長留天地間
釣竿欲拂珊瑚樹深山大澤龍蛇遠春寒野陰風景暮
蓬萊織女回雲車指點虛無引歸一作是征路自是君身有
仙骨世人那得知其故惜君只欲苦死留富貴何如草
頭露蔡侯靜者意有餘清夜置酒臨前除罷琴惆悵月
照席幾歲寄我空中書南尋禹穴見李白道甫問訊今
何如

送從弟游江淮兼謁鄱陽劉太守 李頎

都門柳色朝朝新念爾今為江上人穆陵關帶清風遠
彭蠡湖連芳草春泊舟借問西林寺曉聽猿聲在山翠
潯陽北望鴻鴈回湓水東流客心醉須知聖代舉賢良
不使遺才滯一方應見鄱陽虎符守思歸共指白雲鄉

送蕭三十一之魯中兼問稚子伯禽

李白

六月南風吹白沙吳牛喘月氣成霞水國鬱蒸不可處
時炎道遠無行車夫子如何涉江路雲帆嫋嫋金陵去
高堂倚門望伯魚魯中正是趨庭處我家寄在沙丘傍
三年不歸空斷腸君行既識伯禽子應駕小車騎白羊

送別

高適

古詩 卷二十四
昨夜離心正鬱陶三更白露西風高螢飛木落何淅瀝
此時夢見西歸客曙鐘寥亮三四聲東鄰嘶馬使人驚
攬衣出戶一相送唯見歸雲縱復橫

別梁錕

李頎

梁生倜儻心不羈途窮氣蓋長安兒回頭轉盼似鷓鴣
有志飛鳴人豈知雖云四十無祿位曾與大軍掌書記
抗辭請刃誅部曲作色論兵犯二帥一言不合龍頷侯
擊劍拂衣從此棄朝朝飲酒黃公壚脫帽露頂爭叫呼
庭中犢鼻昔嘗挂懷裏琅玕今在無時人見子多落魄
共笑狂歌非遠圖忽然遣躍紫騮馬還是昂藏一丈夫

洛陽城頭曉霜白層冰峨峨滿川澤但聞行路吟新詩
不歎舉家無擔石莫言貧賤長可欺覆簣成山當有時
莫言富貴長可託木槿朝看暮還落不見古時塞上翁
倚伏由來任天作去去滄波勿復陳五湖三江愁殺人

南陵別兒童入京

一作古意

李白

白酒新

一作初

熟山中歸黃雞啄黍秋正肥呼童烹雞酌

白酒兒女嬉笑牽人衣高歌取醉欲自慰起舞落日爭
光輝游說萬乘苦不早着鞭跨馬涉遠道會稽愚婦輕
買臣余亦辭家西入秦仰天大笑出門去我輩豈是蓬
蒿人

與獨孤漸道別長句兼呈嚴八侍御

岑參

輪臺客舍春草滿潁陽歸客腸堪斷窮荒絕漠鳥不飛
萬積千山夢猶嬾憐君白面一書生讀書千卷未成名
五侯貴門脚不到數畝山田身自耕興來浪跡無遠近
及至辭家憶鄉信無事垂鞭信馬頭西南幾欲窮天盡
奉使三年獨未歸邊頭詞客舊來稀借問君來得幾日
到家不覺換春衣高齋清晝卷羅幕紗帽接羅幃不着
中酒朝眠日色高彈棊夜半燈花落冰片高堆金錯盤
滿堂凜凜五月寒桂林蒲萄新吐蔓武城刺蜜未可餐

軍中置酒夜撾鼓錦筵紅燭月未午花門將軍善胡歌
葉河蕃王能漢語知爾園林壓渭濱夫人堂上泣羅裙
魚龍川北盤谿雨鳥鼠山西洮水雲臺中嚴公於我厚
別後新詩滿人口自憐棄置天西頭因君爲問相思否

留別鄭三韋九兼洛下諸公

高適

憶昨相逢論久要顧君哂我輕常調羈旅雖同白社遊
詩書已作青雲料蹇躓蹉跎竟不成年過四十尚躬耕
長歌達者杯中物大笑前人身後名幸逢明盛多招隱
高山大澤徵求盡此時亦一作也得辭漁樵青袍裹身荷
聖朝犁牛釣竿不復見縣人邑吏來相邀遠路鳴蟬秋

興發華堂美酒離憂銷不知何日更攜手應念茲晨去
折腰

春日留別

孫逖

春路透迤花柳前孤舟晚泊就人煙東山白雲不可見
西陵江月夜娟娟春江夜盡潮聲度征帆遙從此中去
越國山川看漸無可憐愁思江南樹

金陵酒肆留別

李白

白門一作風吹柳花滿店香吳姬壓酒喚一作勸客嘗金陵
子弟來相送欲行不行各盡觴請君問取一作試問東流水
別意與之誰短長

贈別晉三處士

高適

有人家住清河源渡河問我遊梁園手持道經注已畢
心知內篇口不言盧門十年見秋草此心惆悵誰能道
知己從來不易知慕君爲人與君好別時九月桑葉疎
出門千里無行車愛君且欲君先達今上求賢早上書

贈朱中書

丁仙芝

十年種田濱五湖十年遭滂盡爲蕪頻年井稅常不足
今年三纒錢誰爲輸東鄰轉穀五之利西鄰販繒日已貴
而我守道不遷業誰能肯敢效此事紫微侍郎白虎殿
出入通籍迴天眷晨趨絲筆柏梁篇畫出雕盤大官膳

會應憐爾居素約可即長年守貧賤

贈潘侍御論錢少陽

李白

繡衣柱史何昂藏鐵冠白筆橫秋霜三軍論事多引納
堦前虎士羅千將雖無二十五老者且有一翁錢少陽
眉如松雪齊四皓調笑可以安儲皇君能禮此最下士
九州拭目瞻清光

奉贈張荊州

王昌齡

祝融之峯紫雲銜翠如何其雪嶺崑邑西有路綠石壁
我欲從之卧穹嵌魚有心兮脫網罟江無人兮鳴楓杉
王君飛舄仍未去蘇耽宅中意遙緘

江上贈竇長史

李白

漢求季布魯朱家楚逐伍胥去章華萬里南遷夜郎國
三年歸及長風沙聞道青雲貴公子錦帆遊戲一作西
江水人疑天上坐樓船水淨霞明兩重綺相約相期何
太深棹歌搖艇月中尋不同珠履三千客別欲論交一
片心

贈漢陽輔錄事

鸚鵡洲橫漢陽渡水引寒煙沒江樹南浦登樓不見君
君今罷官在何處漢口雙魚白錦鱗令傳尺素報情人
其中字數無一作多少祇是相思秋復春

流夜郎贈辛判官

昔在長安醉花柳五侯七貴同杯酒氣岸遙凌豪士前
風流肯落他一作諸人後夫子紅顏我少年章臺走馬著
金鞭文章獻納麒麟殿歌舞淹留玳瑁筵與君自謂長
如此寧知草動風塵起函谷忽驚胡馬來秦宮桃李向
明一作胡開我愁遠謫夜郎去何日金雞放赦回

走筆贈獨孤駙馬

都尉朝天躍馬歸香風吹人花亂飛銀鞍紫鞵照雲日
左顧右盼生光輝是時僕在金門裏待詔公車謁天子
長揖蒙垂國士恩壯心剖出酬知己一別蹉跎朝市間

青雲之交不可攀儻其公子重回顧何必侯嬴長抱關

贈吳官

王維

長安客舍熱如煮無箇茗糜難御暑空搖白團其諦苦
欲向縹囊還歸旅江鄉鯖鮓不寄來秦人湯餅那堪許
不如儂家任挑達草屨撈蝦富春渚

贈喬琳

一作劉春虛

張謂

去年上策不見收今年寄食仍淹留羨君有酒能便醉
羨君無錢能不憂如今五侯不愛一作待客羨君不問一作
入五侯宅如今七貴方自尊羨君不過七貴門丈夫會
應有知己世上悠悠何安一作足論

駕去溫泉宮後贈楊山人

李白

少年落魄楚漢間，風塵蕭瑟多苦顏。
自言管葛竟誰許，長吁莫錯還閉關。
一朝君王垂拂拭，剖心輸丹雪胸臆。
忽蒙白日回景光，直上青雲生羽翼。
幸陪鸞輦出鴻都，身騎飛龍天馬駒。
王公大人借顏色，金璋紫綬來相趨。
當時結交何紛紛，片言道合惟有君。
待君盡節報明主，然後相攜一作攜卧白雲。
手滄洲

醉後贈從甥高鎮

馬上相逢揖馬鞭，客中相見客中憐。
欲邀擊筑悲歌飲，正值傾家無酒錢。
江東風光不借人，枉殺落花空自春。

黃金逐手快意盡，昨日破產今朝貧。
丈夫何事空嘯傲，不如燒却頭上巾。
君爲進士不得進，我被秋霜生旅鬢。
時清不及英豪人，三尺童兒重廉藺。
匣中盤劍裝鮪魚，間在腰間未用渠。
且將換酒與君醉，醉醉歸託宿吳鉆諸

戲贈姚侍御

丁仙芝

繁霜曉幕鳴柏烏，侍子獸炭然金爐。
重門啓鎖紫髯胡，新披驄馬隴西駒。
頭戴獬豸急晨趨，明光殿前見天子。
今日應彈佞倖夫

代賀若令譽贈沈千運

王季友

相逢問姓名亦存，別時無子今有孫。
山上雙松長不改

百家一作年唯有三家村村南村北車馬道一宿通舟水

浩浩澗中磊磊十里石河上淤泥種桑麥平坡塚墓皆

我親滿田一作戶主人是舊客舉聲酸鼻問同年十人七

一作六人歸下泉分手如何更此地回頭不語淚潛然

醉後戲與趙歌兒

岑參

秦州歌兒歌調苦偏能立唱濮陽女座中醉客不得意
聞之一聲淚如雨向使逢着漢帝憐董賢氣咽不能語

巴陵寄李二戶部張十四禮部時貶岳州司馬

賈至

江南春一作芳草初纂纂愁殺江南獨愁客秦中楊柳也

應新轉憶秦中相憶人萬里鶯花不相見登高一望漢

沾巾

寄韓諫議注

杜甫

今我不樂思洛陽身欲奮飛病在牀美人娟娟隔秋水

濯足洞庭望八荒鴻飛冥冥日月白青楓葉赤天雨霜

玉京羣帝集北斗或騎麒麟翳鳳凰芙蓉旌旗煙霧集

影動倒景搖瀟湘星宮之君醉瓊漿羽人稀少不在傍

似聞昨者赤松子恐是漢代韓張良昔隨劉氏定長安

帷幄未改神慘傷國家成敗吾豈敢色難腥腐餐楓香

周南留滯古莫惜南極老人應壽昌美人何為隔秋水

焉得置之貢玉堂

寄栢學士林居

自胡之反持干戈天下學士亦奔波歎彼幽棲載典籍
蕭然暴露向一作依山阿青山萬里靜散地白雨一洗空
垂蘿亂代飄零余到此古人成敗子如何荆揚春冬異
風土巫峽日夜多雲雨赤葉楓林百舌鳴黃泥野岸天
雞舞盜賊縱橫甚密邇形神寂寞甘辛苦幾時高議排
金門各使蒼生有環堵

洪州客舍寄柳博士芳

薛業

去年燕巢主人屋今年花發路傍枝年年為客不到舍

一作歸去舊國存亡那得知胡塵一起亂天下何處春風無
別離

寄裴施州

杜甫

廊廟之具裴施州宿昔一逢無此流金鐘大鑪在東序
冰壺玉衡懸清秋自從相遇減多病三歲為客寬邊愁
堯有四岳明至理漢二千石真分憂幾度寄書白鹽北
苦寒贈我青羔裘霜雪迴光避錦袖龍蛇一作蛟龍動篋蟠
銀鈎紫衣使者辭復命再拜故卷謝佳政將老已失子
孫憂後來况接才華盛一下有遙憶書樓碧池映句

春日獨坐寄鄭明府

李白

燕麥青青遊子悲河堤弱柳鬱金枝長條一拂春風去
盡日飄揚無定時我在河南別離久那堪坐此對窗牖
情人道來竟不來何人共醉新豐酒

早春寄王漢陽

聞道春還未相識走傍寒梅訪消息昨夜東風入武陽

一作陌頭楊柳黃金色碧水浩浩雲茫茫美人不來空

斷腸預拂青山一片石與君連日醉壺觴

涇谿東亭寄鄭少府諤

我遊東亭不見君沙上行將白鷺羣白鷺閒時散飛去
又如雪點青山雲欲往涇谿不辭遠龍門感波虎眼轉

杜鵑花開春色闌歸向陵陽釣魚晚

寄從孫崇簡

杜甫

嵯峨白帝城東西南有龍湫北虎谿吾孫騎曹不記馬
業學尸鄉多養雞龐公隱時盡室去武陵春樹他人迷
與汝林一作隣居未相失近身藥裏酒長攜牧叟樵童亦
無賴莫令斬斷青雲梯

暮秋枉裴道州手札率爾遣興奉寄兼呈蘇渙侍

御

久客多枉友朋書素書一月凡一束虛名但蒙寒暄一作溫
問泛愛不救溝壑辱齒落未是無心人舌存耻作窮

送哭道州手札適復至紙長要自三過讀盈把那須滄
海珠入懷本倚崑山玉撥棄潭州百斛酒蕪沒瀟岸千
株菊使我晝立煩兒孫令我夜坐費燈燭憶子初尉永
嘉去紅顏白面花映肉軍符侯印取豈遲紫燕綠耳行
甚速聖朝尚飛戰鬪塵濟世宜引英俊人黎元愁痛會
蘇息夷狄跋扈徒逡巡授鉞築壇聞意旨頽綱漏網期
彌綸郭欽上書見大計劉毅答詔驚羣臣他日更僕語
不淺明公論兵氣益振傾壺簫管黑白髮儻劍霜雪吹
青春宴筵曾語蘇季子後來傑出雲孫比茅齋定王城
郭門藥物楚老漁商市市北肩輿每聯袂郭南抱甕亦
隱几無數將軍西第成早作丞相東山起烏雀苦肥秋
粟菽蛟龍欲蝥寒沙水天下鼓角何時休陣前部曲終
日死附書與裴因示蘇此生已愧須人扶致君堯舜付
公等早據要路思捐軀

春日戲題惱郝使君

使君意氣凌青霄憶昨歡娛常見招細馬時鳴金騶裹
佺人屢出董嬌饒東流江水西飛燕可惜春光不相見
願携王趙兩紅顏再騁肌膚如素練通泉百里近梓州
請公一來開我愁舞處重看花滿面尊前還有錦纏頭

上李邕

李白

大鵬一日同風起一作博搖直上九萬里一作指假令風歇時
下來猶能簸却滄溟水世人見我恒一作殊調聞余大
言皆冷笑宣父猶能畏後生丈夫未可輕年少

述德兼陳情上哥舒大夫

天為國家孕英才森森矛戟擁靈臺浩蕩深謀噴江海
縱橫逸氣走風雷丈夫立身有如此一呼三軍皆披靡
衛青謾作大將軍白起真成一豎子

寒夜懷友

二首

王勃

北山煙霧始茫茫南津霜月正蒼蒼秋深客思紛無已
復值征鴻中夜起

複閣重樓向浦開秋風明月度江來故人故情懷故宴
相望相思不相見

客舍悲秋有懷兩省舊遊呈幕中諸公

岑參

三度為郎便白頭一從出守五經秋莫言聖主長不用
其那蒼生應未休人間歲月如流水客舍秋風今又起
不知心事向誰論江上蟬鳴空滿耳

期王將軍不至

杜甫

天雨蕭蕭滯茅屋空山無以慰幽獨銳頭將軍來何遲
令我心中苦不足數看黃霧亂玄雲時聽巖風折喬木

古詩 卷二十四
泉源泠泠雜猿狖泥濘漠漠饑鴻鵠歲暮窮陰耿未已
人生會面難再得憶爾腰下鐵絲箭射殺林中雪色鹿
前者坐皮因問毛知子歷險人馬勞異獸如飛星宿落
應弦不碍蒼山高安得突騎只五千峯然眉骨皆爾曹
走平亂世相催促一豁明主正鬱陶憶昔范增碎玉斗
未一作來使吳兵着白袍昏昏闔闔閉氛祲十月荆南雷
怒號

東谿待蘇戶曹不至

張萬頃

洛陽城東伊水西千花萬竹使人迷臺上柳枝臨岸低
門前荷葉與橋齊日暮待君君不見長風吹雨過青谿

宿東溪李十五山亭

王季友

上山下山入山谷溪中落日留我宿松石依依當主人
主人不在意亦足名花出地兩重階絕頂平天一小齋
本意由來是山水何用相逢語舊懷

宿新豐主人

諸光義

新豐主人新酒熟舊客還歸舊堂宿滿酌香含北砌花
盈尊色泛南軒竹雲散天高秋月明東家少女解秦箏
醉來忘却巴陵道夢中疑是洛陽城

酬李十六岐

王季友

鍊丹文武火未成賣藥販屨俱逃名出谷迷行洛陽道

古詩 卷二十四 二十三
乘流醉卧滑臺城城下故人久離怨一歡適我兩家願
朝飲杖懸沽酒錢暮餐囊有松花飯於何車馬日憧憧
李膺門館爭登龍千賓揖對若流水五經發難如扣鐘
下筆新詩行滿壁立談古人坐在席問我草堂有卧雲
知我山儲無儋石自耕自刈食爲天如鹿如麋飲野泉
亦知世上公卿貴且養丘中草木年

欲之新鄉答崔顥綦母潛

李頎

數年作吏家屢空誰道黑頭成老翁男兒在世無產業
行子出門如轉蓬吾屬交歡此何夕南家擣衣動歸客
銅鑪將炙相歡飲星宿縱橫露華白寒風卷葉度滹沱
飛雪布地悲峩峩孤城日落見栖鳥馬上時聞漁者歌
明朝東路把君手臘日辭君期歲首自知寂寞無去思
敢望縣人致牛酒

同崔傅答賢弟

王維

洛陽才子姑蘇客桂苑殊非故鄉陌九江楓樹幾回青
一片揚州五湖白揚州時有下江兵蘭陵鎮前吹笛聲
夜火人歸富春郭秋風鶴唳石頭城周郎陸弟爲儔侶
對舞前溪歌白紵曲几書留小史家草堂棋賭山陰墅
衣冠若話外臺臣先數夫君席上珍更聞臺閣求三語
遙想風流第一人

故人張諲工詩善易卜兼能丹青草隸頃以詩見

贈聊復酬之

不逐城東遊俠兒隱囊紗帽坐彈棋蜀中夫子時開肆

洛下書一作諸生解詠詩藥欄花徑衡門裏時復據梧聊

隱几屏風誤點惑孫郎團扇草書輕內史故園高枕度

三春永日垂帷絕四隣自想一作惜蔡邕今已老更將書

籍與何人

同張員外諲酬答之作

李頎

洛中高士日沈冥手自灌園方帶經王湛牀頭見周易

張康傳裏好丹青鷓冠葛屨無名位博奕賦詩聊遣意

清言只到衛家兒用筆能誇鍾太尉東籬二月種蘭蓀

窮巷人稀鳥雀喧聞道郎官問生事肯令鬢髮老柴門

自東都還濠州奉酬王八諫議見贈

獨孤及

關西仕時俱稚容彪彪之鬢始相逢天地變化縣城改

天寶中及尉華陰鄭縣別後經祿
山之亂鄭縣殘毀城移於州西獨有故人交態在不

言會合跡未并猶似歲寒心相待洛陽居守寄鄴侯君

著貂冠叅運籌高閣連雲騎省夜新文會友涼風秋青

袍白面昔攜手冉冉府趨君記否雲分雨散十五年始

得一笑樽酒前未遑少留驟遠別况值旅鴈鳴秋天二

華舊遊如夢想他時再又何由緣賴君贈我郢中曲別後相思被管絃

醉後答丁十八以詩譏余搥碎黃鶴樓

李白

黃鶴高樓已搥碎黃鶴仙人無所依黃鶴上天訴玉一作

上帝放却黃鶴江南歸神明太守再雕飾新圖粉壁還

芳菲一州笑我為狂客少年往往來相譏君平簾下誰

家子云是遼東丁令威作詩調我驚逸興白雲遶筆窓

前飛待取明朝酒醒罷與君爛熳尋春暉

酬李壺關奉使行縣憶諸公

儲光羲

青風江上滄浪吟白月宮中一作武林

非有淨清心

同道同房若斷金離居忽有雲山意清韻遙傳舟楫事去時能憶竹園遊來時莫忘桃園記

答高三十五留別便呈于十一

李頎

累薦賢良皆不就家近陳留訪耆舊韓康雖復在人間王霸終思隱巖竇清冷池水灌園蔬萬物滄江心淡如妻子歡同五株柳雲山老對一牀書昨日公車見三事明君賜衣遣為吏懷章不使郡邸驚待詔初從闕庭至散誕由來自不羈低頭授職爾何為故園壁挂烏紗帽官舍塵生白接離寄書寂寂於陵子蓬蒿沒身胡不仕

藜羹被褐環堵中歲晚將貽故人耻

和太尉戲贈高陽公

上官儀

薰爐御史出神仙雲鞍羽蓋下芝田紅塵正起浮橋路
青樓遙敞御溝前傾城比態芳菲節絕世相嬌是六年
慣是洛濱要解珮本自河間好數錢翠釵照曜銜雲髮
玉步逶迤動羅袜石榴絞帶輕花轉桃枝綠扇微風發
無情拂袂欲留賓詎恨深潭不可越天津一别九秋長
豈若隨聞三日香南國自然勝掌上東家復是憶王昌

和盧明府送鄭十三還京兼寄之什

孟浩然

昔時風景登臨地今日衣冠送別筵醉坐
澤酒思歸長望白雲天洞庭一葉驚秋早
淩落空嗟滯江島寄語朝廷當世人何時重見長安道

同張侍御燕北樓

儲光羲

今之太守古諸侯出入雙旌垂七旒朝覽干戈時聽訟
暮延賓客復登樓西山漠漠嶮巖色北渚沈沈江漢流
良宵清淨方高會繡服光輝聯皂蓋魚龍恍惚堦墀
除下雲霧杳冥牕戶外水靈慷慨行泣珠游女飄飄思
解佩蒼蒼低月半遙城落落踈星滿太清不分
襟悲楚奏願言吹笛退胡兵軒后青丘埋猊猊周王白

羽掃攬槍期君武節朝龍闕余亦翱翔歸玉京

陪王侍御同登東山最高頂宴姚通泉晚攜酒汎

江

杜甫

姚公美政誰與儔不減昔時陳太丘邑中上客有桂史
多暇日陪驄馬遊東山高頂羅珍羞下顧城郭銷我憂
清江白日落欲盡復攜美人登彩舟笛聲憤怒一作哀
中流妙舞逶迤夜未休燈前往往大魚出聽曲低昂如
有求三更風起寒浪湧取樂喧呼覺船重滿空星河光
破碎四座賓客色不動請公臨深江一作莫相違迴船罷
酒上馬歸人生歡會豈有極無使霜露沾人衣

秋日宴滕王閣

序曰南昌故郡洪都新府星分翼軫地接衡廬襟三江而帶五湖控

蠻荆而引甌越物華天寶龍光射斗牛之墟人傑地靈徐孺下陳蕃之榻雄州霧列俊彩星馳
臺隍枕夷夏之交賓主盡東南之美都督閻公之雅望
棨戟遙臨宇文新州之懿範
十旬休暇勝友如雲千里逢迎高朋滿座騰蛟起鳳孟學士之詞宗紫電清霜王將軍之武庫
家君作宰路出名區童子何知躬逢勝餞時維九月序屬三秋潦水淨而寒潭清煙光凝而暮山紫儼駢闐于上路訪風景于崇阿臨帝子之長洲得仙人之舊館層巒聳翠上出重霄飛閣流丹下臨無地鶴汀鳧渚窮島嶼之縈迴桂殿蘭宮列崗巒之體勢披瀟闔俯雕甍山原曠其盈視川澤盱其駭矚間闔撲地鐘鳴鼎食之家舸艦迷津青雀黃龍之軸虹銷雨霽彩徹雲衢落霞與孤鶩齊飛秋水共長天一色漁舟唱晚響窮彭蠡之濱鴈陣驚寒聲斷衡陽之浦遙吟俯暢逸興遄飛爽籟發而清風生纖歌凝而白雲遏睢園綠竹氣凌彭澤之樽鄴水朱華光照

臨川之筆四美具二難并窮睇盼于中天極嬉
 遊于暇日天高地迥覺宇宙之無窮與盡悲來
 識盈晏之有數望長安于日下指吳會于雲間
 地勢極而南溟深天柱高而北辰遠關山難越
 誰悲失路之人萍水相逢盡是他鄉之客懷帝
 關而不見奉宣室以何年嗟乎時運不齊命途
 多舛馮唐易老李廣難封屈賈諶于長沙非無
 聖主竄梁鴻于海曲豈乏明時所賴君子安貧
 達人知命老當益壯寧知白首之心窮且益堅
 不墜青雲之志酌貪泉而覺爽處涸轍以猶歡
 北海雖賒扶搖可接東隅已逝桑榆非晚孟嘗
 高潔空懷報國之心阮籍猖狂豈效窮途之哭
 勃三尺微命一介書生無路請纓等終軍之弱
 冠有懷投筆慕宗慤之長風捨簪笏于百齡奉
 晨昏于萬里非謝家之寶樹接孟氏之芳鄰他
 日趨庭叨陪對今晨奉袂喜託龍門揚意不
 逢撫凌雲而自惜鍾鼎既遇奏流水以何慙焉
 呼勝地不常盛筵難再蘭亭已矣梓澤丘墟臨
 別贈言幸承恩於俸錢登高作賦是所望于羣
 公敢竭鄙懷恭疏短引一言均賦四韻俱成

王勃

滕王高閣臨江渚珮玉鳴鸞罷歌舞畫棟朝飛南浦雲
 朱簾暮捲西山雨閒雲潭影日悠悠物換星移幾度秋
 閣中帝子今何在檻外長江空自流

夏宴張兵曹東堂

李頎

重林華屋堪避暑况乃烹鮮會佳客主人三十朝大夫
 滿座森然見矛戟北牕卧簟連心花竹裏蟬鳴西日斜
 羽扇搖風却珠汗玉盆貯水割甘瓜雲峯峨峨自冰雪
 坐對芳樽不知熱醉來但挂葛巾眠莫道明朝有離別

酒泉太守夜集

席上作

岑參

琵琶長笛曲相和羌兒胡雛齊唱歌
渾炙犁牛烹野駝
交河美酒金叵羅三更醉後軍中寢
無奈秦山歸夢何

涼州館中與諸判官夜集

一作梁

彎彎月出掛城頭城頭月出照梁州
梁州七里一作城

萬家胡人半解彈琵琶琵琶一曲腸堪斷
風蕭蕭今夜

漫漫河西幕中多故人故人別來三五春花門樓前見

秋草豈能貧賤相看老一生大笑能幾迴
斗酒相逢須

醉倒

澗湖作

序曰巴丘南澗湖者蓋沅湘澧澗之餘波
焉茲水也淪匯洞庭澹澹千里夏潦奔注
則洸為此湖冬霜既零則涸為平野按爾雅
水反入為澗斯名之作有由焉爾而此鄉炎暑

子月草生彌望青青相與遊藉豈盈虛之可歎
亦風景之多傷感物增懷因書其事

趙冬曦

三湖返入兩山間畜作澗湖灣復灣
暑雨奔流潭正滿

微霜及潦水初還水還波卷谿潭
涸綠草芊芊岸嶄岸

適來一作方飛棹共迴旋已復揚鞭恣行樂
道傍耆老步

蹶蹶楚言茲事不知年試就湖邊披草徑
莫疑東海變

桑田君訝今時盡陵陸我看明歲更淪漣
來今自昔無

終始人事迴環當若是應一作懸思闕下聲華日
誰謂江

潭旅遊子初貞正喜固當然往蹇來譽宜可俟
盈虛用

捨輪輿旋勿學靈均遠問天

和趙侍御

張說

江南湖水咽山川
春江溢入共湖連
氣色紛淪橫罩海
波濤鼓怒上漫天
鱗宗殼族嬉為府
弋叟鼠師利焉聚
歌帆側柂弄風口
赴險臨深繞灣浦
一灣一浦悵遭迴
千曲千澹恍迷哉
乍見靈妃含笑往
復聞遊女怨歌來
暑來寒往運洄洑
潭生水落移陵谷
雲間墜翮散泥沙
波上浮查棲樹木
昨暮飛霜下北津
今朝行鴈度南濱
處處溝洫清源竭
年年舊葦白頭新
天地盈虛尚難保
人間倚伏何須道
秋月^{晶晶}汎澄瀾
冬景青青步纖草
念君宿昔觀物變
安得踟躕不衰老

入少密谿

沈佺期

雲峰苔壁遶谿斜
江路香風夾岸花
樹密不言通鳥道
雞鳴始覺有人家
人家更在深巖口
澗水周流宅前後
遊魚瞥瞥雙釣童
伐木丁丁一^{一作衆}樵叟
自言避喧非避秦
薜衣耕鑿帝堯人
相留且待雞黍熟
夕卧深山蘿月春

發劉郎浦

杜甫

挂帆早發劉郎浦
疾風颯颯昏亭午
舟中無日不沙塵
岸上空村盡豺虎
十日北風風未迴
客行歲晚猶相催
白頭厭伴漁人宿
黃帽青鞋歸去來

發閩中

前有毒蛇後猛虎溪行盡日無村塢江風蕭蕭雲拂地

山木慘慘天欲雨女病妻憂歸意速一作急秋花錦石誰

復一作能數別家三月一得書避地何時免愁苦

夜宿浙江

孫逖

扁舟夜入江潭泊露白風秋一作高氣蕭索富春渚上潮

未還天姥岑邊月初落烟水茫茫多苦心更聞江上越

人吟洛陽城闕何時見西北浮雲朝暝深

封丘縣作

高適

我本漁樵孟諸野一生自是悠悠者乍可狂歌草澤中

寧堪竹吏風塵下祇言小邑無所為公門百事皆有期

拜迎官長心欲碎一作破鞭撻黎庶令人悲歸來向家問

妻子舉家盡笑今如此生事應須南畝田世情付與東

流水夢想舊山安在哉為銜君命日一作且遲迴乃知梅

福徒為爾轉憶陶潛歸去來

江上有懷

王適

湛湛江水見底清荷花蓮子傷江生採蓮將欲寄同心

秋風落花空復情棹歌數曲如有待正見明月度東海

海上雲盡月蒼蒼萬里分輝清洛陽洛陽閨閣夜何央

蛾眉嬋娟斷人腸寂寥金屏空自掩青燵銀燭不生光

應憐水宿洞庭子今夕迢迢天一

臨河客舍呈狄明府兄留題縣南樓

岑參

黎陽城南雪正飛黎陽渡頭人未歸

一作口渡稀

河邊酒家

堪寄宿主人小女能縫衣故人高卧黎陽縣一别三年

不相見邑中雨雪偏着時隔河東郡人遥羨鄴都唯見

古時丘漳水還如舊日流城上望鄉應不見朝來好是

懶登樓

山陰縣西樓

孫逖

都邑西樓芳樹間逶迤霽色遶江山

一作海

月夜從公

署出江雲晚對訟庭還誰知春色朝朝好二月飛花滿

江草一見湖邊楊柳風遙憶青青洛陽道

城南亭作

張說

珂馬朝歸連萬石稍門洞啓親迎客北堂珍重琥珀酒

庭前列肆茱萸席長袖遲迴意緒多清商緩轉目騰波

舊傳比翼侯家舞新出將雛主第歌漢家絳灌餘兵氣

晉代浮虛安足貴正逢天下金鏡清偏加日飲醇醪意

誰復遨遊不復歸閒庭莫畏不芳菲會待城南春色至

競將花柳拂羅衣

銀山積西館

岑參

古詩 卷二十四 三十三
銀山峽口風似箭鐵門關西月如練雙雙愁淚沾馬毛
颯颯胡沙迸人面丈夫三十未富貴安能終日守筆硯

題李別駕壁

高適

去鄉不遠逢知己握手相歡得如此禮樂遙傳魯伯禽
賓客爭過魏公子酒筵暮散明月上櫪馬長鳴春風起
一生稱意能幾人今日從君問終始

醉題匡城周少府壁

岑參

婦姑城南風雨秋婦姑城中人獨愁愁雲遮却望鄉處
數日不上西南樓故人薄暮公事閒玉壺美酒琥珀殷
潁陽秋草今黃盡醉卧君家猶未還

夜歸山中

杜甫

夜來歸來衝虎過山黑家中已眠卧傷見北斗向江低
仰看明星當空大庭前把燭噀兩炬峽口驚猿聞一箇
白頭老罷舞復歌杖藜不睡誰能那

引水

月峽瞿塘雲作頂亂石崢嶸俗無井雲安沽水奴僕悲
魚復移居心力省白帝城西萬竹蟠接筒引水喉不乾
人生留滯生理難斗水何直百憂寬

軍中人日登高贈房明府

宋之問

幽郊昨夜陰風斷頓覺朝來陽吹暖涇水橋南柳欲黃

杜陵城北花應滿。長安昨夜寄春衣。短翮登茲一望歸。聞道凱旋乘騎入。看君走馬見芳菲。

人日寄杜二拾遺

高適

人日題詩寄草堂。遙憐故人思故鄉。柳條弄色不忍見。梅花滿枝堪斷腸。身在遠藩一作南蕃無所預。心懷百憂復

千慮。今年人日空相憶。明年人日知何處。一卧東山三

十春。豈知書劍與一作老風塵。龍鍾還忝二千石。愧爾東

西南北人。

追酬故高蜀州

序曰開文書帙中檢所遺忘因得故高常侍適往居在成都時高任

蜀州刺史人日相憶見寄詩淚灑行間讀終篇未自枉詩已十餘年莫記存沒又六七年矣老

病懷舊生意可知今海內忘形故人獨漢中王瑀與昭州敬使君超先在愛而不見情見乎辭大曆五年正月二十一日却追酬高公此作因寄王及敬弟 杜甫

自蒙蜀州人日作不意清詩久零落。今晨散帙眼忽開。

迸淚幽吟事如昨。嗚呼壯士多慷慨。合沓高名動寥廓。

歎我悽悽求友篇。感時鬱鬱匡君略。錦里春光空爛熳。

瑤池侍臣已冥冥。瀟湘水國旁鼉鼉。鄂杜秋天失鵬鷃。

東西南北更堪論。白首扁舟病獨存。遙一作猶拱北辰纏

寇盜。欲傾東海洗乾坤。邊塞西蕃最克斥。衣冠南渡多

崩奔。鼓瑟至今悲帝子。曳裾何處覓王門。文章曹植波

瀾潤。服食劉安德業尊。長笛誰能亂愁思。昭州詞翰與

招寬

初入秦川路逢寒食

玄宗

洛陽一作川芳樹映天津
灞岸垂楊宰地新
直為經過行樂處
不知虛度兩京春
去年餘閨今春早
曙色和風著花草
可憐寒食與清明
光輝併在長安道
自從關路入秦川
爭道何人不戲鞭
公子途中妨蹴鞠
佳人馬上廢鞦韆
渭水長橋今欲渡
葱葱漸見新豐樹
遠看驪岫入雲霄
預想湯池起煙霧
煙霧氛氲水殿開
暫拂香泉歸去來
今歲清明行已晚
明年寒食更相陪

奉和

張說

上陽柳色喚春歸
臨渭桃花拂水飛
總為朝廷巡幸去
頓教京洛少光輝
昨從分陝山南口
馳道依依漸花柳
入關正投寒食前
還京遂落清明後
路上天心重豫游
御前恩賜特風流
便幕那能鏤雞子
行宮善巧帖毛裘
渭橋南渡花如撲
麥隴青青斷人目
漢家行樹直新豐
秦地驪山抱溫谷
香池春溜水初平
預歡浴日照京城
今歲隨宜過寒食
明一作來年陪宴作清明

寒食江州蒲塘驛

宋之問

去年上巳洛橋邊
今年寒食廬山曲
遙憐鞏樹花應滿
復見吳洲草新綠
吳洲芳草蘭杜芳
感物思歸懷故鄉

古詩 卷二十四 三十一
驛騎明朝發何處猿聲今夜斷君腸

寒食陸渾別業

洛陽城裏花如雪陸渾山中今始發
旦別河橋楊柳風夕卧伊川桃李月
伊川桃李正芳新寒食山中酒復春
野老不知堯舜力酣歌一曲太平人

寒食城東卽事

王維

清谿一道穿桃李演漾綠蒲涵白芷
谿上人家凡幾家落花半落東流水
蹴踘屢過飛鳥上鞦韆競出垂楊裏
少年分日作遨遊不用清明兼上巳

清明

杜甫

著處繁華矜是日長沙千人萬人出
渡頭翠柳豔明君爭道朱蹄驕嚙膝
此都好遊湘西寺諸將亦自軍中至
馬援征行在眼前葛強親近同心事
金鐙下山紅粉一作日晚牙檣捩
拖青樓遠古時喪亂皆可知人世悲歡暫
相遣弟姪雖存不得書干戈未息苦離居
逢迎少壯非吾道况乃今朝更袞除

七夕

崔顥

長安城中月如練家家此夜持針線
仙裙玉珮空自知天上人間不相見
長信深陰夜轉幽瑤堦金閣數螢流
班姬此夕愁無限河漢三更看斗牛

九日酬顏少府

高適

簷前白日應可惜籬下黃花爲誰有
行子迎霜未授衣
主人得錢始沽酒蘇秦顛顛人一作時
多厭蔡澤棲遲一作
世看醜縱使登高只斷腸不如獨坐空搔首

洛中晴月送殷四入關

劉希夷

清洛浮橋南渡頭天晶萬里散華洲
晴看石瀨光無數
曉入寒潭浸不流微雲一點曙煙起南陌
憧憧遍行子
欲將此意與君論復道秦關向一作尚
千里一作散華洲一作林葉秋

明月

李如璧

三五月華流炯光可憐懷歸一作君
郢路長逾江越漢津

無梁遙遙永夜思茫茫昭君失寵辭上宮
蛾眉嬋娟臥
羶穹胡人琵琶彈北風漢家音信絕南鴻
昭君此時怨
畫工可憐明月光臃腫節旣秋今天向寒
沅有漪兮湘
有瀾沅湘糾合森漫漫洛陽才子憶長安
可憐明月復
團團逐臣戀主心愈恪棄妻思君情不薄
已悲芳歲徒
淪落復恐紅顏坐銷鑠可憐明月方照灼
向影傾身比
葵藿

把酒問月

故人賈淳令余問之

李白

青天有月來幾時我今停杯一問之人攀
明月不可得
月行却與人相隨皎如飛鏡臨丹闕綠煙
滅盡一作清

言 卷二十一 四 三十一
輝發但見宵從海上來寧知曉向雲間沒白兔擣藥秋
復春嫦娥孤棲與誰鄰今人不見古時月今月曾經照
古人古人今人若流水共看明月皆如此唯一作願當
歌對酒時月光長照金樽裏

秋風二首

杜甫

秋風淅淅吹巫山上牢下牢脩水關吳檣楚柁牽百丈
暖向神都寒未還要路何日罷長戟戰自青羌連白蠻
中巴不得消息好暝傳戍鼓長雲間

秋風淅淅吹我衣東流之外西日微天清小城擣練急
石古細路行人稀不知明月爲誰好早晚孤帆他一作也

夜歸會將白髮倚庭樹故園池臺今是非

晚晴

高唐暮冬雲

一作雪

壯哉舊瘴無復似塵埃崖沈谷沒白

皚皚江石缺裂青楓摧南天三旬苦霧開赤日照耀從
西來六龍寒急光徘徊照我衰顏忽落地口中吟詠心
中哀未恠及時少年子揚眉結義黃金臺汨乎吾生何
飄零支離委絕同死灰

少室雪晴送王寧

李頎

少室衆峰幾峰別一峰晴見一峰雪隔城半山連青松
素色峨峨千萬重過景斜臨不可道白雲欲盡難爲容

古言 卷二十四 三十九
行人與我翫幽境北風切切吹衣冷惜別浮橋駐馬時
舉頭試望南山嶺

對雪醉後贈王歷陽

李白

有身莫犯飛龍鱗有手莫辯猛虎鬚君看昔日汝南市
白頭仙人隱玉壺子猷聞風動牕竹相邀共醉杯中綠
歷陽何異山陰時白雪飛花亂人目君家有酒我何愁
客多樂酣秉燭遊謝尚自能鸚鵡舞相如免脫鸚鵡裘
興罷一作清晨鼓棹過江去他日西看却月樓一作千里相思明月樓

巡邊在河北作

張說

去年六月西河西今年六月北河北沙場磧路何爲爾

重氣輕生知許國人生在世能幾時壯年征戰髮如絲
會待安邊報明主作頌封山也未遲

代春閨

崔液

江南日暖鴻始來柳條初碧葉半開玉關遙遙戍未迴
金閨日夕生綠苔寂寂春花煙色暮簷燕雙雙落花度
青樓明鏡晝無光紅帳羅衣徒自香妾恨十年長獨守
君情萬里在漁陽

前題 一作思邊

李白

去年何時君別妾南園綠草飛蝴蝶今歲何時妾憶君
西山白雪暗秦雲玉關去此三千里欲寄音書那得一作

可聞

夏日閨情

蔡瓌

桃徑李蹊絕芳園炎氛熾日滿愁軒枝上鳥驚朱槿落
池中魚戲綠蘋翻君戀京師久留滯妾怨高樓積年歲
非關曾入楚王宮直爲相思腰轉細卧簟乘閒乍逐涼
薰爐畏熱懶焚香雨霑柳葉如啼眼露滴蓮花似汗妝
全由獨自羞看影豔是孤眠疑夜永無情拂鏡不成妝
有時卻扇還風靜近日書來道欲歸鴛鴦文錦字息機
但恐愁容不相識爲教恒着別時衣

怨情

李白

新人如花雖可寵故人似玉由來重花性飄揚不自持
玉心皎潔終不移故人昔新今尚故還見新人有故時
請看陳后黃金屋寂寂珠簾生網絲

代閨人答輕薄少年

崔顥

妾家近隔鳳凰池粉壁紗牕楊柳垂本期漢代金吾壻
誤嫁長安遊俠兒兒家夫壻多輕薄借客探丸重然諾
平明挾彈入新豐日晚揮鞭出長樂青絲白馬冶遊園
能使行人駐馬看自矜陌上繁華盛不念閨中花鳥闌
花間陌上春將晚走馬鬪雞猶未返三時出望無消息
一去那知行近遠桃李花開覆井欄朱樓落日捲簾看

言 卷二十四 四十一
愁來欲奏相思曲，抱得秦箏不忍彈。

和贈遠

獨孤孫肖

憶得去年春風至，中庭桃李映瑣牕。美人挾瑟對芳樹，
玉顏亭亭與花雙。今年新花如舊時，去年美人不在茲。
借問離居恨深淺，祇應獨有庭花知。

夜坐看搗箏

王諲

調箏夜坐燈光裏，却挂羅帷露織指。朱絃一一聲不同，
玉柱連連影相似。不知何處學新聲，曲曲彈來未覩名。
應是石家金谷裏，流傳未滿洛陽城。

夜聞鬢篋

杜甫

夜聞鬢篋滄江上，衰年側耳情所嚮。鄰舟一聽多感傷，
塞曲三更歟悲壯。積雪飛霜此夜寒，孤燈急管復風湍。
君知天地干戈滿，不見江湖行路難。

魏倉曹東堂檉樹

李頎

愛君雙檉一樹奇，千葉齊生萬葉垂。長頭拂石帶煙雨，
獨立空山人莫知。攢青蓄翠陰滿屋，紫穗紅英曾斷目。
洛陽墨客遊雲間，若到麻源第三谷。

題河邊枯柳

王泠然

隋家天子憶揚州，厭坐深宮傷海遊。穿地鑿山開御路，
鳴笳疊鼓汎春流。流從鞏北分河一作汾口，直到淮南種

官柳功成力盡人旋亡運

一作代

謝年移樹空有當時綵

女侍君王帳殿旌門對柳行青葉交垂連幔色白花飛

散

一作度

染衣香今日摧殘何用道數里曾無一株好驛

騎江

一作正

帆損更多山精野魅藏應老涼秋

一作風

九

八月露為霜日夜孤舟入帝鄉河畔時時聞落葉

一作木落

客中無箇不

一作不淚

沾裳

望人家桃李花

賀知章

山源夜雨度仙家朝發東園桃李花桃花紅兮李花白

照灼城隅復南陌南陌青樓十二重春風桃李為誰容

棄置千金輕不顧踟躕五馬謝相逢徒言南國客華晚

遂歎西家飄落遠的皪長奉明光殿氛氲半入披香苑

苑中珍木元自竒黃金作葉白銀枝千年萬歲不凋落

還將桃李更相宜桃李從來露井傍成蹊結影矜艷陽

莫道春花不可樹會持仙實薦君王

歎庭前甘菊花

杜甫

庭

一作庭

前甘菊移時晚青蘂重陽不堪摘明日蕭條盡

醉醒殘花爛熳開何益籬邊野外多衆芳采擷細瑣升

中堂念茲空長大枝葉結根失所纏風霜

風雨看舟前落花戲為新句

江上人家桃李枝春寒細雨出疎籬影遭碧水潛勾引

風妬紅花却倒吹吹花困嬾菊舟楫水光風力俱相快
赤憎輕薄遮人懷珍重分明不來接一作折濕久飛遲半
欲高縈沙惹草細於毛蜜蜂蝴蝶生情性一作注偷眼睛
蛭避百勞

失羣鴈

序曰溫縣明府以鴈詩垂示余以為古之
郎官出宰百里今之墨綬入應千古事止
鴈行未宜傷歎至如羸卧空巖者乃可為失羣
勵耳聊因伏枕多暇以斯文應之

盧照隣

三秋北地雪皚皚萬里南翔渡海來欲隨石燕沈湘水
試逐銅鳥繞帝臺帝臺銀闕距金塘中間鷓鴣已成行
先過上苑傳書信暫下中洲戲稻梁虞人負繳來相及

齊客虛弓忽見傷毛翎頻頓

顛一作顛

飛無力羽翮摧頽君

不識唯有莊周解愛鳴復道郊歌重奇色惆悵驚思悲
未已徘徊自憐中因極傳聞有鳥集朝陽詎勝仙鳧邇
帝鄉雲間海上應鳴舞遠得鷓鴣弦猶獨撫金龜全寫中
牟印玉鵠當變萊蕪釜願君弄影鳳皇池時憶籠中摧
折羽

王兵馬使二角鷹

杜甫

悲臺蕭瑟石龍從哀壑杈枒浩呼洶中有萬里之長江
迴風滔日孤光動角鷹翻倒壯士臂將軍玉帳軒勇氣
二鷹猛腦條徐墜目如愁胡視天地杉雞竹兔不自惜

孩虎野羊俱辟易，講上鋒稜十二翮。將軍勇銳與之敵，
將軍樹勳起安西。崑崙虞泉入馬蹄，白羽曾肉三狡狴。
敢決豈不與之齊，荆南芮公得將軍。亦如角鷹下翔雲，
惡鳥飛飛啄金屋。安得爾輩開其羣，驅出六合梟鸞分。

江畔老人愁

崔顥


江南年少十八九，乘舟欲渡青谿口。青谿口邊一老翁，
鬢眉皓白已衰朽。自言家代仕梁陳，垂朱拖紫三十人。
兩朝出將復入相，五世疊鼓垂朱輪。父兄三葉皆尚主，
子女四代為妃嬪。南山賜田接御苑，北宮甲第連紫宸。
直言榮華未休歇，不覺山崩海將竭。兵戈亂入建康城，

煙火連燒未央闕。衣冠士子陷鋒刃，良將名臣盡埋沒。
山川改易失市朝，衢路縱橫填白骨。老人此時尚少年，
脫身走得投海邊。罷兵歲餘未敢出去，鄉三載方來旋。
蓬蒿忘却五城宅，草木不識青谿田。雖然得歸到鄉土，
零丁貧賤長辛苦。采樵屢入歷陽山，刈稻常過新林浦。
少年欲知老人歲，豈知今年一百五。君今少壯我已衰，
我昔少年君不睹。人生貴賤各有時，莫見羸老相輕欺。
感君相問為君說，說罷不覺令人悲。

代悲白頭翁

劉希夷

洛陽城東桃李花，飛來飛去落誰家。幽閨一作洛陽兒女惜



好一作顏色坐見一作落花長歎息今年花落顏色改明

年花開復誰在已見松柏摧為薪更聞桑田變成海古

人無復洛城東今人還對落花風年年歲歲花相似歲

歲年年人不同寄言全盛紅顏子須一作憐半死白頭

翁此翁白頭真可憐伊昔紅顏美少年公子王孫芳樹

下清歌妙舞落花前光祿池臺文一作錦繡將軍樓閣

畫神仙一朝卧病無相一作識三春行樂在誰邊宛轉

蛾眉能幾時須臾鶴髮亂如絲但看古來歌舞地惟有

黃昏鳥雀悲

代北州老翁答

張謂

負薪老翁往北州北望鄉關生客愁自言老翁有三子

兩人已向黃沙死如今小兒新長成明年聞道又徵兵

定知此別必零落不及相隨同死生盡將田宅借鄰伍

且復伶俜去鄉土在生本求多子孫及有誰知更辛苦

近傳天子尊武臣強兵直欲靜胡塵安邊自合有長策

何必流離中國人

夜泊黃山聞殷十四吳吟

李白

昨夜誰為吳會吟風生萬壑振空林龍驚不敢水中卧

猿嘯時聞巖下音我宿黃山碧谿月聽之却罷松間琴

朝來果是滄洲逸酤酒提盤飯霜粟半酣更發江海聲

客愁頓向杯中失

觀于舍人壁畫山水

王季友

野人宿在人家少朝見此山謂山曉半壁仍棲嶺上雲
開簾欲放一作放出湖中鳥獨坐長松是阿誰再三招手起
來遲于公大笑向予說小弟丹青能爾為

觀元丹丘畫巫山屏風

李白

昔遊三峽見巫山見畫巫山宛相似疑是天邊十二峰
飛入君家彩屏裏寒松蕭颯如有聲陽臺微茫如有情
錦衾瑤席何寂寂楚王神女徒盈盈高咫尺如千里
翠屏丹崖粲如綺蒼蒼遠樹圍荆門歷歷行舟泛巴水
水石潺湲萬壑分煙光草色俱氛氲谿花笑日何年發
江客聽猿幾歲聞使人對此心緬邈疑入嵩丘夢彩雲
崔五六圖屏風各賦一物得烏孫佩刀

李頎

烏孫腰間佩兩刀刃可吹毛錦為帶握中枕宿穹廬室
馬上割飛翳螭塞執之魍魎誰能前氣凜清風沙漠邊
磨用陰山一片玉洗將胡地獨流泉主人屏風寫奇狀
鐵鞘金環儼相向回頭瞪目時一看使予心在江湖上
謝宇文少府見贈桃竹書筒

李白

桃竹書筒綺繡文良工巧妙稱絕羣靈心圓映三江月

彩質疊成五色雲中藏寶訣峨眉去千里提携長憶君

曲江 三首

杜甫

曲江蕭條秋氣高
芰荷枯折隨風濤
游子空嗟垂二毛
白石素沙亦相蕩
哀鴻獨叫求其曹

卽事非今亦非古
長歌激越梢林莽
比屋豪華固難數
吾人甘作心似死一作死
灰弟姪何傷淚如雨

自斷此生休問天
杜曲幸有桑麻田
故將移住南山邊
短衣匹馬隨李廣
看射猛虎終殘年

釋悶

四海十年不解兵
犬戎也復臨咸京
失道非關出襄野

揚揚一作揚

鞭忽是過湖城
豺狼塞路人斷絕
烽火照夜屍

縱橫天子亦應厭
奔走羣公固合思
昇平但恐誅求不
改轍聞道嬖孽能
全生江邊老翁錯
料事眼暗不見風
塵清

可歎

天上浮雲如白衣
斯須改變如蒼狗
古往今來共一時
人生萬事無不有
近者抉眼去其夫
河東女兒身姓柳
丈夫正色動引經
艷城客子王季友
羣書萬卷常暗誦
孝經一通看在手
貧窮老瘦家賣履
好事就之爲攜酒
豫章太守高帝孫
引爲賓客敬頗久
問道三年未曾語

小心恐懼閉其口太守得之更不疑人生反覆看亦一作
已醜明月無瑕豈容易紫氣鬱鬱猶衝斗時危可仗真
豪俊二人得置君側否太守頃者領山南一作在邦人
思之比父母王生早曾拜顏色高山之外皆培塿用爲
義和天爲成用平水土地爲厚王也論道阻江湖李也
疑丞曠前後死爲星辰終不滅致君堯舜爲肯朽吾輩
碌碌飽飯行風后力牧長回首

憶昔 二首

憶昔先皇巡朔方千乘萬騎入咸陽陰山驕子濟血馬
長驅東胡胡走藏鄴城反覆不足恠關中小兒壞紀綱

張后不樂上爲愜至今今上猶撥亂勞心焦思補四方
我昔近侍叨奉引出兵整肅不可當爲留猛士守未央
致使岐雍防西羌犬戎直來坐御牀百官跣足隨天王
願見北地傅介子老儒不用尚書郎

憶昔開元全盛日小邑猶藏萬家室稻米流脂粟米白
公私倉廩俱豐實九州道路無豺虎遠行不勞吉日出
齊紈魯縞車斑斑男耕女桑不相失宮中聖人奏雲門
天下朋友皆膠漆百餘年間未災變叔孫禮樂蕭何律
豈聞一絹直萬錢有田種穀今流血洛陽宮殿燒焚盡
宗廟新除狐兔穴傷心不忍問耆舊復恐初從亂離說

小臣魯鈍無所能朝廷記識蒙祿秩周宣中興望我皇
灑血江漢長衰疾

自平

自平宮中呂太一收珠南海千餘日近供生犀翡翠稀
復恐征戍干戈密蠻谿豪族小山一作動搖世封刺史非
時朝蓬萊殿裏諸主將才如伏波不得驕

近聞

近聞犬戎遠遁逃牧馬不敢侵臨洮渭水逶迤白日靜
隴山蕭瑟秋雲高崆峒五原亦無事北庭數有關中使
似聞贊普更求親舅甥和好應難棄

漁陽

漁陽突騎猶精銳赫赫雍王都節制猛將飄然恐後時
本朝不入非高計祿山北築堆武城舊防敗走歸其營
繫書請問燕耆舊今日何須十萬兵

青絲

青絲白馬誰家子籠豪且逐風塵起不聞漢主放妃嬪
近靜潼關掃蜂蟻殿前兵馬破汝時十月卽爲齋粉期
未如面縛歸金闕萬一皇恩下玉墀

百子池懷古

張諤

舊聞百子漢家池漢家深水今逶迤宮女厭鏡笑窺池

古言 卷二十四 五十一
身影後不相見無數容華空自知

高陽池懷古

送朱二

孟浩然

當昔襄陽雄盛時山公常醉習家池池邊釣女日

一作自

相隨妝成照影競來窺紅

一作澄

波澹澹芙蓉發綠岸

麩楊柳垂一朝物變人亦非四面荒涼人徑

一作住一作稀意

氣豪華何處在空餘草露濕羅衣此地朝來餞行者翻

向此中牧征馬征馬分飛日漸

一作漸日

斜見此空爲人所

嗟殷勤爲訪桃源路予亦歸來松子家

長樂宮懷古

秦城舊來稱窈窕漢家更衣應不少紅粉邀君在何處

青樓苦夜長難曉長樂宮中鐘暗來可憐歌舞慣相催

歡娛此事今寂寞惟有年年陵樹哀

邵陵懷古

張謂

嘗聞虞帝苦憂人祗爲蒼生不爲身已道一朝辭北闕

何須五月更南巡昔時文武皆銷鑠今日精靈常寂寞

斑竹年來笋自生白蘋春盡花空落遙望零陵見舊丘

蒼梧雲起至今愁惟餘帝子千行淚添作瀟湘萬里流

至端州驛見杜五審言沈三佺期間五朝隱王二

無競題壁慨然成詠

宋之問

逐臣北地承嚴譴謂到南中每相見豈意南中岐路多

古詩 卷之二十四 五十一
千山萬水一作千里萬里分鄉縣雲搖雨散各翻飛海濶天長
音信稀處處山川同瘴癘自憐能得幾人歸

哭李象

楊衡

白鷄黃犬不將去寂寞空餘墓時路草死花開更幾年
後人知是何人墓憶君思君獨不眠夜寒月照青楓樹

大覺高僧蘭若

和尚去冬往河南

杜甫

巫山不見廬山遠松林蘭若秋風晚一老猶鳴日暮鐘
諸僧尚乞齋時飯香爐峯色隱晴湖種杏仙家近白榆
飛錫去年啼邑子獻花何日許門徒

別李秘書始興寺所居

不見秘書心若失及見秘書失心疾安爲動主理信然
我獨覺子神克實重聞西方止觀經老身古寺風泠泠
妻兒待米且歸去他日杖藜來細聽

寄澈公

楊衡

北風吹霜霜月明荷葉枯盡越水清別來幾度龍宮宿
雪山童子應相逐

偃師東與翰樽同詣景雲暉上人卽事

岑參

山陰老僧解楞伽穎陽歸客遠相過煙深草濕昨夜雨
雨後秋風渡漕河空山終日塵事少平郊遠見行人小

尚書磧上黃昏鐘別駕渡頭一歸鳥

題巴州光福寺楠木

嚴武

楚江長流對楚寺楠木幽生赤崖背臨溪挿石盤老根
苔色青蒼山雨痕高枝鬧葉鳥不度半掩白雲朝與暮
香殿蕭條轉密陰花龕滴瀝垂清露聞道偏多越水頭
煙生霽歛使人愁月明忽憶湘川夜後叫還思鄂渚秋
看君幽靄幾千丈寂寞窮山今遇賞亦知鐘梵報黃昏
猶卧禪林戀奇響

前題

史俊

近郭城南山寺深亭亭奇樹出禪林結根幽壑不知歲
聳榦摩天凡幾尋翠色晚將嵐氣合月光時有夜猿吟
經行綠葉望成蓋宴坐黃花長滿襟此木嘗聞生豫章
今朝獨秀在巴鄉凌霜不肯讓松柏作宇由來稱棟梁
會待良工時一盼應歸泐水作慈航

照公院雙橙

李頎

種橙夾階生得地細葉隔簾見雙翠抽條向長未及肩
泉水遶根日三四青青何必楚人家帶雨凝烟新著花
永願香爐灑甘露夕陽時映東枝斜南庭黃竹爾不敵
借問何時堪挂錫

送王道士還山

嵩陽道士餐柏實居處三花對石室心窮伏火陽精丹
口誦淮王萬畢術自言神訣不可求我師聞之玄圃遊
出入彤庭佩金印承恩赫赫如王侯雙峯樹下曾受業
應傳肘後長生法吾聞仙地多後身安知不是具茨人
玉膏清泠瀑泉水白雲谿中日方此從今不見數十年
鬢髮顏容只如是先生捨我欲何歸竹杖黃裳登翠微
當有巖前白蝙蝠迎君日暮雙來飛

賦得明星玉女壇送廉察尉華陰 王翰

洪河之南曰秦鎮發地削成五千仞三峰離地皆倚天
唯獨中峰持修峻上有明星玉女祠祠壇高眇路透迤

三十六梯入河漢樵人往往見蛾眉蛾眉嬋娟又宜笑
一見樵人下靈廟仙車欲駕五雲飛香扇斜開九華照
含情遲佇惜韶年願侍君邊復中旋江妃玉佩留爲念
羸女銀簫空自憐仙俗途殊兩情遽感君無盡辭君去
遙見明星是妾家風飄雲散不知處故人家在西長安
賣藥往來投此山綵雲蕩漾不可見綠蘿蒙茸鳥綿蠻
欲求玉女長生法日夜燒香應自還


代女道士王靈妃贈道士李榮 駱賓王

玄都五府風塵絕碧海三山波浪深桃實千年非易待
桑田一變已難尋別有仙居對三市金闕銀宮相向起

臺前鏡影伴仙娥樓上簫聲隨鳳史鳳樓迢遞絕塵埃
鶯時物色正徘徊靈芝紫檢參差長仙桂丹花重疊開
雙童綽約時遊陟三鳥聯翩報消息盡言真侶出遨遊
傳道風光無限極輕花委砌惹裾香殘月窺窗覘幌色
箇時無數併妖妍箇裏無窮總可憐別有衆中稱黜帝
天上人間少流例洛濱仙駕啓遙源淮浦靈津符遠溘
自言少小慕幽玄只言容易得神仙佩中邀勒經時序
簫裏尋思復幾年尋思許事真情變二八容華識少選
漫道燒丹止七飛空傳化石曾三轉寄語天上弄機人
寄語河邊值查客乍可忽忽共百年誰使遙遙期七夕

想知人意自相尋果得深心共一心一心一意無窮已
投漆投膠非足擬只將羞澁當風流持此相憐保終始
相憐相念倍相親一生一代一雙人不把丹心比玄石
惟將濁水况清塵只言柱下留期信好欲將心學松蘿
不能京兆畫蛾眉翻向成都騁騶引青牛紫氣度靈關
尺素頰鱗去不還連苔上砌無窮綠脩竹臨壇幾處斑
此時空牀難獨守此日別離那可久梅花如雪柳如絲
年去年來不自持初言別在寒偏在何悟春來春更思
春時物色無端緒雙枕孤眠誰分許分念嬌鶯一種啼
生憎燕子千般語朝雲旭日照青樓暉暉麗色滿皇州

言
卷二十四
五十五
落花泛泛浮靈沼垂柳長長拂御溝御溝大道多奇賞
俠客妖容遞來往寶騎連花鐵作錢香輪驚水珠爲網
香輪寶騎競繁華可憐今夜宿倡家鸚鵡杯中浮竹葉
鳳皇琴裏落梅花許葦多情偏送款爲問春花幾時滿
千回鳥信說衆諸百過鶯啼訴長短長短衆諸判不尋
千回百過浪關心何曾舉意西鄰玉未肯留情南陌金
南陌西鄰咸自保還轡歸期須及早爲想三春狹斜路
莫辭九折邛關道假令白里似長安須使青牛學劍端
蘋風入馭來應易竹杖成龍去不難龍驂去去無消息
鸞鏡朝朝減容色君心不記下山人妾欲空期上林翼
上林三月鴻欲稀華表千年鶴未歸不分淹留桑路待
祗應直取桂輪飛



蘇蕙直艮卦補派

上林二月蘇岩蘇華表千羊鱗未羶不衣奮留桑韻卦

